

CONFUEGO 2011

di Maria Vietz

E coscì i capriççi do Besagno,
vegïo infingardo riâ senza semenza,
o n'ha misso n'âtra votta co' o cù a bagno
costrenzendone a 'na crua penitenza.

Dixan che sto diluvio universale
l'ha ordinou o Padre Onnipotente,
ma me sa ch'ò deve avisela un po' a male
pe o carattere imböso de 'sta gente.

Ma anche Ti, bello Segnô mæ cão,
ti devi avei o pilucco sotta a-o naso,
se in sce-a punta da lingua t'æ l'amao
de piggiäsela tanto no l'ëa o caxo.

Niatri zeneixi se no ti o savesci,
semmo da gente sgrezza e manco tanti,
e sciccome no semmo nasciui nesci
emmo deciso de continuâ a-a andâ avanti.

Se semmo inzenoggiæ ma no ancon dommi,
tutti pe un e un pe tutti semmo
zoveni e vegi, foesté e donne e ommi.
"frangar no flectar" Ti vedïæ ghe a femmo!!

E oua c'ho reçitou a mæ orazion
me saia cão fame i fæti mæ,
andamene pe Zena un po' in giandon
pe rivedde i vegi canti da çittæ.

Camminavo pe-a strada un po' sperdüa
no capivo ciù ninte né dov'ëo:
palassi storici, banchi de verdüa,
marciapé ingombri de gente sconosciûa

mercanzia d'ogni sorta cacciâ in tæra
stoffe e tappeti d'ogni razza e colore
in fondo un sommergibile da guæra
e un galeon spelou co' un vapore.

A questo punto aveivo a testa lucca,
traverso a strada e cangio de sesté,
me ne vaddo un pittin zù pe S. Lucca
armeno là no me sciaccan i pê.

No l'avesse mai pensou, né fæto mai
pêzo ch'andâ de neutte. Quella gente
in mêzo a di palazzi millenai
a g'ha installou tutto l'Estremo Oriente!

Ninte de personale, segge ciæo,
gente attiva ch'a loua e assæ corteize,
ma pesta o diao se no diggo o vëo:
ghe fuse stæto un strasson de zeneize!

Ma donde son i zeneixi, ond'en andæti?
Son emigrae comme i oxelli a-a seja?
Quelli de poche parole e tanti fæti?
Son scappâ a recoviampe pe Suzzèia

L'unica sarva con Luccoli e Campetto.
Camminavo cianin, contando pria pe pria,
amiavo e vedrinn-e in bel'assetto...
ma cai amixi che malinconia.

I negozi eleganti, tutto veuo
a gente a camminava a euggi bassi
a mi so andæta via portando apreuvo
a mæ pecondria, tornando in sce-i mæ passi.

E De Ferrari, a ciassa ciù elegante
da gran Superba o çentro çittadin
no vorriæ diventâ troppo pedante
ma pe mi e l'è solo un gran casin.

Ma a sorpreisa ciù fenomenale
ch'a m'ha lasciou basïa comme un macco
vedde in sce-i piedistalli do Ducale
tronezza 'na carottoa co un bacco!!!

A Paxo s'accapimmo dove a storia
a l'ha scritto e vicende da çittæ
e pagine ciù splendide da gloria
de tutti i Duxi che ghe son passæ.

Bacco e carottoa, cose me rappresentan
Foscia esprimman un concetto astræto
Domandemmo a quelli che ne sentan
o ancon megio, a quello ch'ò l'ha fæto.

Comunque en li, monito ai çittadin
no credo l'aggian missi pe demoa
andemmo adaxo, che se ghe gia o...
ne mettan n'âtra votta sott'a coa.

N' âtra cösa però ve veuggio dî
primma de retornâ a casa mæ
vorriæ parlave un po' de l'A.M.T.
l'azienda di trasporti da çittæ,

parco vettue in veste renovâ,
belli i display luminosi a-a vista,
peccou però, che pe poei montâ
ti devi fâ un corso d'alpinista

o avei e gambe comme i norvegeixi
o l'anca snodâ comme i ballerin
perché i sedili a bordo son appeixi
in çimma a panoramici scalin.

Monta chi riesce e quelli ch'en in cian
o orrievan attaccase a-e manegge,
o restan appeixi comme fâ Tarzan
o statici comme d'inerzia a lezze.

E a dive tutto o tempo o no l'è assæ
e cose en tante e mi devo andâ via
e sciccome de parlâ no l'ho ciù coae
chiedo venia. So a voxè da çittæ.